

欽定宋書

卷二  
十二

宋書卷二十二

梁

沈

約

撰

志第十二

樂四

漢鞞舞歌五篇

關東有賢女

章和二年中

樂久長

四方皇

殿前生桂樹

魏輦舞歌五篇

明明魏皇帝

太和有聖帝

魏歷長

天生烝民

爲君旣不易

魏陳思王輦舞歌五篇

聖皇篇

當章和二年中

聖皇應歷數

正康帝道休

九州咸賓服

威德洞八幽

三公奏諸公

不得久淹留

蕃位任至重

舊章咸率由

侍臣省文奏

陛下體仁慈

沈吟有愛戀

不忍聽可之

迫有官典憲

不得顧恩私

諸王當就國

璽綬何纍縷

僂時舍外殿

宮省寂無人

主上增顧念

皇母懷苦辛

何以爲贈賜

傾府竭寶珍

支錢百億萬

采帛若煙雲

乘輿服御物

錦羅與金銀

龍旗垂九旒

羽蓋參班輪

諸王自計念

無功荷厚德

思一効筋力

糜軀以報國

鴻臚攤節衛

副使隨經營

貴戚竝出送

夾道交輜輶

車服齊整設

鞞畢耀天精

武騎衛前後

鼓吹簫笳聲

祖道魏東門

淚下霑冠纓

扳蓋因內顧

俛仰慕同生

行行將日莫

何時還闕庭

車輪爲裴回

四馬躊躇鳴

路人尚酸鼻

何況骨肉情

靈芝篇

當殿前生桂樹

靈芝生玉地

朱草被洛濱

榮華相晃耀

光采曄若神

古時有虞舜

父母頑且嚚

盡孝於田隴

烝烝不違仁

伯瑜年七十

采衣以娛親

慈母笞不痛

歔歔涕沾巾

丁蘭少失母

自傷蚤孤糞

刻木當嚴親

朝夕致三牲

暴子見陵侮

犯臯以亡形

丈人爲泣血

免戾全其名

董永遭家貧

父老財無遺

舉假以供養

傭作致甘肥

責家填門至

不知何用歸

天靈感至德

神女爲秉機

歲月不安居

烏乎我皇考

生我旣已晚

棄我何期蚤

蓼莪誰所興

念之令人老

退詠南風詩

灑淚滿襟抱

亂曰

聖皇君四海

德教朝夕宣

萬國咸禮讓

百姓家肅虔

庠序不失儀

孝悌處中田

戶有曾閔子

比屋皆仁賢

髻亂無天齒

黃髮盡其年

陛下三萬歲

慈母亦復然

大魏篇

當漢吉昌



大魏應靈符

天祿方甫始

聖教致泰和

神明爲驅使

左右宜供養

中殿宜皇子

陛下長壽考

羣臣拜賀咸說喜

積善有餘慶

榮祿固天常

衆善填門至

臣子蒙福祥

無患及陽遂

輔翼我聖皇

衆吉咸集會

凶邪姦惡竝滅亡

黃鵠游殿前

神鼎周四阿

玉馬充乘輿

芝蓋樹九華

白虎戲西除

舍利從辟邪

騏驎躡足舞

鳳凰拊翼歌

豐年大置酒

玉尊列廣庭

樂飲過三爵

朱顏暴已形

式宴不違禮

君臣歌鹿鳴

樂人舞鞞鼓

百官靄抃贊若驚

儲禮如江海

積善若陵山

皇嗣繁且熾

孫子列曾玄

羣臣咸稱萬歲

陛下長樂壽年

御酒停未飲

貴戚跪東廂

侍人承顏色

奉進金玉觴

此酒亦真酒

福祿當聖皇

陛下臨軒笑

左右咸歡康

栝來一何遲

羣僚以次行

賞賜累千億

百官竝富昌

精微篇

當關中有賢女

精微爛金石

至心動神明

杞妻哭死夫

梁山爲之傾

子丹西質秦

烏白馬角生

鄒美囚燕市

繁霜爲夏零

關東有賢女

自字蘇來卿

壯年報父仇

身沒垂功名

女休逢赦書

白刃幾在頸

俱上列僊籍

去死獨就生

太倉令有擧

遠徵當就拘

自悲居無男

禍至無與俱

緹縈痛父言

何儋西上書

槃桓北闕下

泣淚何漣如

乞得并姊弟

沒身贖父軀

漢文感其義

肉刑法用除

其父得以免

辨義在列圖

多男亦何爲

一女足成居

簡子南渡河

津吏廢舟舩

執法將加刑

女娟擁擢前

妾父聞君來

將涉不測淵

畏懼風波起

禱祝祭名川

備禮饗神祇

爲君求福先

不勝酬祀誠

至今犯罰艱

君必欲加誅

乞使知罪讐

妾願以身代

至誠感蒼天

國君高其義

其父用赦原

河激奏中流

簡子知其賢

歸娉爲夫人

榮寵超後先

辨女解父命

何況健少年

黃初發和氣

明堂德教施

治道致太平

禮樂風俗移

刑錯民無枉

怨女復何爲

聖皇長壽考

景福常來儀

孟冬篇

當狡兔

孟冬十月

陰氣厲清

武官誠田

講旅統兵

元龜襲吉

元光著明

蚩尤蹕路

風弭雨停

乘輿啓行

鸞鳴幽軋

虎賁采騎

飛象珥鷓

鐘鼓鏗鏘

簫管嘈喝

萬騎齊鑣

千乘等蓋

夷山填谷

平林滌藪

張羅萬里

盡其飛走

翟翟狡兎

揚白跳翰

獵以青骹

掩以脩竿

韓盧宋鵠

呈才騁足

噬不盡縲

牽麋掎鹿

魏氏發機

養基撫弦

都盧尋高

搜索猴猿

慶忌孟賁

蹈谷超巒

張目決背

髮怒穿冠

頓熊扼虎

蹴豹搏羆

氣有餘勢

負象而趨

獲車旣盈

日側樂終

罷役解徒

大饗離宮

亂曰

聖皇臨飛軒

論功校獵徒

死禽積如京

流血成溝渠

明詔大勞賜

大官供有無

走馬行酒醴

驅車布肉魚

鳴鼓舉觴爵

鐘擊位無餘



絕網縱麟麇

弛罩出鳳雛

收功在羽校

威靈振鬼區

陛下長懽樂

永世合天符

晉鞞舞歌五篇

洪業篇

鞞鼓歌當魏曲明明魏皇帝

古曲關東有賢女

宣文勅洪業

盛德在泰始

聖皇應靈符

受命君四海

萬國何所樂

上有明天子

唐堯禪帝位

虞舜惟恭己

恭己正南面

道化與時移

大赦盪萌漸

文教被黃支

象天則地

體無爲

聰明配日月

神聖參兩儀

雖有三凶類

靜言無所施

象天則地

體無爲

稷契竝佐命

伊呂升王臣

蘭芷登朝肆

下無失宿民

聲發響自應

表立景來附

虓虎從羈制

潛龍升天路

備物立成器

變通極其數

百事以時敘

萬幾有常度

訓之以克讓

納之以忠恕

羣下仰清風

海外同懽慕

象天則地

化雲布

昔日貴雕飾

今尚儉與素

昔日多纖介

今去情與故

象天則地

化雲布

濟濟大朝士

夙夜綜萬機

萬機無廢理

明明降疇咨

臣譬列星景

君配朝日暉

事業竝通濟

功烈何巍巍

五帝繼三皇

三王世所歸

聖德應期運

天地不能違

仰之彌已高

猶天不可階

將復御龍氏

鳳皇在庭棲

天命篇

輦舞歌當魏曲太和有聖帝

古曲章和二年中

聖祖受天命

應期輔魏皇

入則綜萬機

出則征四方

朝廷無遺理

方表寧且康

道隆舜臣堯

積德踰太王

孟度阻窮險

造亂天一隅

神兵出不意

奉命致天誅

赦善戮有罪

元惡宗爲虛

威風震勁蜀

武烈懼疆吳

諸葛不知命

肆逆亂天常

擁徒十餘萬

數來寇邊疆

我皇邁神武

秉鉞鎮雍涼

亮乃畏天威

未戰先仆僵

盈虛自然運

時變固多難

東征陵海表

萬里梟賊淵

受遺齊七政

曹爽又滔天

羣凶受誅殛

百祿咸來臻

黃華應福始

王凌爲禍先

景皇帝

輦舞歌當魏曲魏歷長

古曲樂久長

景皇帝

聰明命世生

盛德參天地

帝王道

創基旣已難

繼世亦未易

外則夏侯玄

內則張與李

三凶稱逆

亂帝紀

從天行誅

窮其姦宄

邊將御其漸

潛謀不得起

罪人咸伏辜

威風震萬里

平衡綜萬機

萬機無不理

召陵桓不君

內外何紛紛

衆小便成羣

蒙昧恣心

治亂不分

獻聖獨斷

濟武常以文

從天惟廢立

掃霓披浮雲

雲霓既已闕

清和未幾間

羽檄首尾至

變起東南蕃

儉欽爲長蛇

外則馮吳蠻

萬國紛騷擾

戚戚天下懼不安

神武御六軍

我皇秉鉞征

儉欽起壽春

前鋒據項城 出其不意

竝縱奇兵

奇兵誠難御

廟勝實難支

兩軍不期遇

敵退計無施

虎騎惟武進

大戰沙陽陂

欽乃亡竟走

奔虜若雲披

天恩赦有辜

東土放鯨鯢

大晉篇 輦舞歌當魏曲天生蒸民 古曲四方皇



赫赫大晉

於穆文皇

蕩蕩巍巍

道邁陶唐

世稱三皇五帝

及今重其光

九德克明

文旣顯武又章

恩弘六合

兼濟萬方

內舉元凱

朝政以綱

外簡虎臣

時惟鷹揚

靡從不懷

逆命斯亡

仁配春日

威踰秋霜

濟濟多士

同茲蘭芳

唐虞至治

四凶滔天

致討儉欽

罔不肅虔

化感海外

海外來賓

獻其聲樂

竝稱妾臣

西蜀猾夏

僭號方域

命將致討

委國稽服

吳人放命

馮海阻江

飛書告諭

響應來同

先王建萬國

九服爲蕃衛

亡秦壞諸侯

序胙不二世

歷代不能復

忽踰五百歲

我皇邁聖德

應期勅典制

分土五等

蕃國正封界

莘莘文武佐

千秋邁嘉會

洪業溢區內

仁風翔海外

明君篇

輦舞歌當魏曲爲君旣不易

古曲殿前生桂樹

明君御四海

聽鑑盡物情

顧望有譴罰

竭忠身必榮

蘭茝出荒野

萬里升紫庭

茨草穢堂階

埽截不得生

能否莫相蒙

百官正其名

恭己慎有爲

有爲無不成

闇君不自信

羣下執異端

正直罹譖潤

姦臣奪其權

雖欲盡忠誠

結舌不敢言

結舌亦何憚

盡忠爲身患

清流豈不潔

飛塵濁其源

岐路令人迷

未遠勝不還

忠臣立君朝

正色不顧身

邪正不竝存

譬若胡與秦

秦胡有合時

邪正各異津

忠臣遇明君

乾乾惟日新

羣目統在綱

衆星拱北辰

設令遭闇主

斥退爲凡民

雖薄供時用

白茅猶可珍

冰霜晝夜結

蘭桂摧爲薪

邪臣多端變

用心何委曲

便辟從情指

動隨君所欲

偷安樂目前

不問清與濁

積僞罔時主

養交以持祿

言行恒相違

難饜甚谿谷

昧死射乾沒

覺露則滅族

右五篇 輦舞歌行

鐸舞歌詩二篇

聖人制禮樂篇

昔皇文武邪

彌爾舍善

誰吾時吾

行許帝道

銜來治路萬邪

治路萬邪

赫赫

意黃運道吾

治路萬邪

善道明邪金邪

善道

明邪金邪帝邪

近帝武武邪邪

聖皇八音

偶邪尊來

聖皇八音

及來義邪同邪

烏及來義邪

善草供國吾

咄等邪烏

近帝邪武邪

近帝武邪武邪

應節合用

武邪尊邪

應節合用

酒期義邪同邪

酒期義邪

善草供國吾

咄等邪烏

近帝邪武邪

近帝武武邪邪

下音足木

上爲鼓義邪

應衆義邪

樂邪邪延否

已邪烏已禮祥

咄等邪烏

素女有絕其聖烏烏武邪

雲門篇

鐸舞歌行當魏太和時

黃雲門

唐咸池

虞韶舞

夏殷濩

刑伐有五

振鐸鳴金

近大武

清歌發倡

刑爲主

聲和八音

協律呂

身不虛動

手不徒舉

應節合度

周其敘

時奏宮商

雜之以徵羽

下饜衆目

上從鐘鼓

樂以移風

與德禮相輔

安有失其所

右二篇 鐸舞歌行

拂舞歌詩五篇

白鳩篇

翩翩白鳩

再飛再鳴

懷我君德

來集君庭

白雀呈瑞

素羽明鮮

翔庭舞翼

以應仁乾

交交鳴鳩

或丹或黃

樂我君惠

振羽來翔

東壁餘光

魚在江湖

惠而不費

敬我微軀

策我良駟

習我驅馳

與君周旋

樂道亡餘

我心虛靜

我志霑濡

彈琴鼓瑟

聊以自娛

陵雲登臺

浮游太清

扳龍附鳳

日望身輕

濟濟篇

暢飛暢舞

氣流芳

追念三五

大綺黃

去失有

時可行

去來同時

此未央

時冉冉

近桑榆

但當飲酒

爲歡娛



衰老逝

有何期

多憂耿耿

內懷思

淵池廣

魚獨希

願得黃浦

衆所依

恩感人

世無比

悲歌具舞

無極已

獨祿篇

獨祿獨祿

水深泥濁

泥濁尚可

水深殺我

雌雌雙鴈

遊戲田畔

我欲射鴈

念子孤散

翩翩浮萍

得風遙輕

我心何合

與之同并

空牀低帷

誰知無人

夜衣錦繡

誰別僞真

刀鳴箭中

倚牀無施

父冤不報

欲活何爲

猛虎班班

游戲山間

虎欲噬人

不避豪賢

碣石篇

東臨碣石

以觀滄海

水何澹澹

山島竦峙

樹木叢生

百草豐茂

秋風蕭瑟

洪波湧起

日月之行

若出其中

星漢燦爛

若出其裏

幸甚至哉

歌以詠志

觀滄海

孟冬十月

北風裴回

天氣肅清

繁霜霏霏

鷓鴣晨鳴

鴈過南飛

鷺鳥潛藏

熊羆窟棲

錢鏹停置

農收積場

逆旅整設

以通賈商

幸甚至哉

歌以詠志

冬十月

鄉土不同

河朔隆寒

流澌浮漂

舟舩難行

錐不入地

豐籟深奧

水竭不流

冰堅可蹈

士隱者貧

勇俠輕非

心常歎怨

戚戚多悲

幸甚至哉

歌以詠志

土不同

神龜雖壽

猶有竟時

騰蛇乘霧

終爲土灰

老驥伏櫪

志在千里

烈士莫年

壯心不已

盈縮之期

不但在天

養怡之福

可得永年

幸甚至哉

歌以詠志

龜雖壽

淮南王篇

淮南王

自言尊

百尺高樓與天連

後園鑿井銀作牀

金瓶素綆汲寒漿

汲寒漿

飲少年

少年窈窕何能賢

揚聲悲歌音絕天

我欲度河河無梁

願化雙黃鵠

還故鄉

還故鄉

入故里

徘徊故鄉

身不已

繁舞寄聲無不泰

徘徊桑梓遊天外

右五篇拂舞行

杯槃舞歌詩一篇

晉世寧

四海平

普天安樂永大寧

四海安

天下歡

樂治興隆舞杯槃

舞杯槃

何翩翩

舉坐翻覆壽萬年

天與日

終與一

左回右轉不相失

箏笛悲

酒舞疲

心中慷慨可健兒

樽酒甘

絲竹清

願令諸君醉復醒

醉復醒

時合同

四坐歡樂皆言工

絲竹音

可不聽

亦舞此槃左右輕

自相當

合坐歡樂人命長

人命長

當結友

千秋萬歲皆老壽

右杯槃舞歌行

巾舞歌詩一篇

吾不見公莫時吾何嬰公來嬰姥時吾哺聲何爲茂時  
爲來嬰當思吾明月之上轉起吾何嬰土來嬰轉去吾  
哺聲何爲土轉南來嬰當去吾城上羊下食草吾何嬰  
下來吾食草吾哺聲汝何三年針縮何來嬰吾亦老吾  
平平門淫涕下吾何嬰何來嬰涕下吾哺聲昔結吾馬

客來嬰吾當行吾度四州洛四海吾何嬰海何來嬰海  
何來嬰四海吾哺聲焞西馬頭香來嬰吾洛道吾河五  
丈度汲水吾噫邪哺誰當求兒母何意零邪錢健步哺  
誰當吾求兒母何吾哺聲三針一發交時還弩心意何  
零意弩心遙來嬰弩心哺聲復相頭巾意何零何邪相  
哺頭巾相吾來嬰頭巾母何何吾復來推排意何零相  
哺推相來嬰推非母何吾復車輪意何零子以邪相哺  
轉輪吾來嬰轉母何吾使君去時意何零子以邪使君  
去時使來嬰去時母何吾思君去時意何零子以邪思  
君去時思來嬰吾去時母何何吾吾

右公莫巾舞歌行

白紵舞歌詩三篇

高舉兩手白鵠翔

輕軀徐起何洋洋

凝停善睽容儀光

宛若龍轉乍低昂

隨世而變誠無方

如推若引留且行

宋世方昌樂未央

舞以盡神安可忘

愛之遺誰贈佳人

質如輕雲色如銀

袍以光軀巾拂塵

制以爲袍餘作巾

四坐歡樂胡可陳

清歌徐舞降祇神

右一篇



雙袂齊舉鸞鳳翔

羅裾飄飄昭儀光

趨步生姿進流芳

鳴弦清歌及三陽

人生世間如電過

樂時每少苦日多

幸及良辰曜春花

齊倡獻舞趙女歌

羲和馳景逝不停

春露未晞嚴霜零

百草凋索花落英

蟋蟀吟牖寒蟬鳴

百年之命忽若傾

蚤知迅速秉燭行

東造扶桑游紫庭

西至崑崙戲曾城

右一篇

陽春白日風花香

趨步明玉舞瑤瑤

聲發金石媚笙簧

羅袿徐轉紅袖揚

清歌流響繞鳳梁

如矜若思凝且翔

轉盼遺精豔輝光

將流將引雙鴈翔

歡來何晚意何長

明君御世永歌倡

右一篇白紵舊新合三篇

宋秦始皇歌曲詞

皇業頌

歌自堯至楚元王  
高祖世世載聖德

明帝造

皇業沿德建

帝運資勲融

肩唐重盛軌

胄楚載休風

堯舜兆深祥

元王衍遐慶

積善傳上業

昨福啟英聖

衰數隨金祿

登歷昌永命

維宋丞光烈

世美流舞咏

聖祖頌

聖祖惟高德

積勲代晉歷

永建享鴻基

萬古盛音冊

獻文纘宸馭

廣運崇帝聲

衍德被仁祉

留化洽民靈

孝建締孝業

允協天人謀

宇內齊政軌

宙表燭威流

鐘管騰列聖

彝銘賁重猷

明君大雅

虞繇造

明君應乾數

撥亂紐積基

民慶來蘇日

國頌薰風詩

天步或蹙難

列蕃扇迷慝

廟勝敷九代

神謨洞七德

文教洗昏俗

武誼清稷埏

英勲冠帝則

萬壽永衍天

通國風

明帝造

開寶國

資賢昌

謨明盛

弼諧光

烈武惟略

景王勲

南康華容

變政文

猛績爰著

有左軍

三王到氏

文武贊

丞相作輔

屬伊旦

沈柳宗侯

皆殄亂

泰始開運

超百王

司徒驃騎

勲德康

江安謀效

殷誠彰

劉沈承規

功名揚

慶歸我后

胙無疆

天符頌

明帝造

天符革運

世誕英皇

在館神炫

既壯龍驤

六鍾集表

四緯駢光

於穆配天

永休厥祥

明德頌

明帝造

明德浮教

幽符麗紀

山鼎見奇

醴液涵祉

鵠雛耀儀

騶虞游趾

福延億胙

慶流萬祀

帝圖頌

帝圖凝遠

瑞美昭宣

濟流月鏡

鹿毳霜鮮

甘露降和

花雪表年

孝德載衍

芳風永傳

龍躍大雅

龍躍式符

王燿蕃宮

歲淹豫野

璽屬嬪中

江波澈映

石栢開文

觀毓花藥

樓凝景雲

白鳥三獲

甘液再呈

嘉稔表沃

連理協成

德充動物

道積通神

宋業允大

靈瑞方臻

淮祥風

淮祥應

賢彥生

翼贊中興

致太平

宋世大雅

虞龢造

宋世寧

在泰始

醉酒歡

飽德喜

萬國朝

上壽酒

帝同天

惟長久

治兵大雅

明帝造

王命治兵

有征無戰

巾拂以淨

醜類革面

王儀振旅

載戢在辰

中虛巾拂

四表靜塵

白紵篇大雅

明帝造

在心曰志發言詩

聲成于文被管絃

手舞足蹈欣泰時

移風易俗王化基



琴角揮韻白雲舒

簫韻協音神鳳來

拊擊和節詠在初

章曲乍畢情有餘

文同軌壹道德行

國靖民和禮樂成

四縣庭響美勲英

八列陛倡貴人聲

舞飾麗華樂容工

羅裳皎日袂隨風

金翠列輝蕙麝豐

淑姿委體允帝衷

漢鼓吹鏡歌十八曲

朱鷺曲

朱鷺魚以烏路訾邪鷺何食食茄下不之食不以吐將

以問誅

一作者

思悲翁曲

思悲翁唐思奪我美人侵以遇悲翁也但我思蓬首一作

蕞狗逐狡兔食交君梟子五梟母六拉杳高飛莫安宿

艾如張曲

艾而張羅夷於何行成之四時和山出黃雀亦有羅雀  
以高飛奈雀何爲此倚欲誰肯磔室

上之回曲

上之回所中益夏將至行將北以承甘泉宮寒暑德游  
石關望諸國月支臣匈奴服令從百官疾驅馳千秋萬  
歲樂無極

翁離曲

攤離趾中可築室何用葺之蕙用蘭攤離趾中

戰城南曲

戰城南死郭北野死不葬烏可食爲我謂烏且爲客豪  
野死諒不葬腐肉安能去子逃水深激激蒲葦冥冥梟  
騎戰鬪死驚馬裴回鳴梁築室何以南梁何北禾黍而  
穫君何食願爲忠臣安可得思子良臣良臣誠可思朝  
行出攻莫不夜歸

巫山高曲

巫山高高以大淮水深難以逝我欲東歸害梁不爲我  
集無高曳水何梁湯湯回回臨水遠望泣下霑衣遠道

之人心思歸謂之何

上陵曲

上陵何美美下津風以寒問客從何來言從水中央桂  
樹爲君舩青絲爲君竿木蘭爲君櫂黃金錯其間滄海  
之雀赤翅鴻白鴈隨山林乍開乍合曾不知日月明醴  
泉之水光澤何蔚蔚芝爲車龍爲馬覽遨游四海外甘  
露初二年芝生銅池中僊人下來飲延壽千萬歲

將進酒曲

將進酒乘太白辨加哉詩審搏放故歌心所作同陰氣  
詩悉索使禹良工觀者苦

君馬黃歌

君馬黃臣馬蒼三馬同逐臣馬良易之有騁蔡有赭美人歸以南駕車馳馬美人傷我心佳人歸以北駕車馳馬佳人安終極

芳樹曲

芳樹日月君亂如於風芳樹不上無心溫而鵠三而爲行臨蘭池心中懷我悵心不可匡目不可顧妬人之子悲殺人君有它心樂不可禁王將何似如孫如魚乎悲矣

有所思曲

有所思乃在大海南何用問遺君雙珠璫瑁簪用玉紹  
繚之聞君有它心拉雜摧燒之摧燒之當風揚其灰從  
今以往勿復相思相思與君絕雞鳴狗吠兄嫂當知之  
妃呼狶秋風蕭蕭晨風颺東方須臾高知之

雉子曲

雉子班如此之于雉梁無以吾翁孺雉子知得雉子高  
飛止黃鵠蜚之以千里王可思雄來蜚從雌視子趨一  
雉雉子車大駕馬滕被王送行所中堯芊蜚從王孫行  
聖人出曲

聖人出陰陽和美人出游九河佳人來駢離哉何駕六

飛龍四時和君之臣明護不道美人哉宜天子免甘星  
筮樂甫始美人子含四海

上邪曲

上邪我欲與君相知長命無絕衰山無陵江水爲竭冬  
雷震震夏雨雪天地合乃敢與君絕

臨高臺曲

臨高臺以軒下有清水清且寒江有香草日以蘭黃鵠  
高飛離哉翻關弓射鵠令我主壽萬年收中吾

遠如期曲

遠如期益如壽處天左側大樂萬歲與天無極雅樂陳

佳哉紛單于自歸動如驚心虞心大佳萬人還來謁者  
引鄉殿陳累世未嘗聞之增壽萬年亦誠哉

石留曲

石留涼陽涼石水流爲沙錫以微河爲香向始蘇冷將  
風陽北逝肯無敢與于楊心邪懷蘭志金安薄北方開  
留離蘭

魏鼓吹曲十二篇

繆襲造

漢第一曲朱鷺今第一曲初之平言魏也

初之平

義兵征

神武奮

金鼓鳴

邁武德

揚洪名

漢室微

社稷傾



皇道失

桓與靈

闔宮熾

羣雄爭

邊韓起

亂金城

中國擾

無紀經

赫武皇

起旗旌

麾天下

天下平

濟九州

九州寧

勅武功

武功成

越五帝

邇三王

興禮樂

定紀綱

普日月

齊暉光

右初之平曲凡三十句句三字

漢第二曲思悲翁今第二曲戰榮陽言曹公也

戰榮陽

汴水陂

戎士憤怒

貫甲馳

陳未成

退徐榮

二萬騎

塹壘平

戎馬傷

六軍驚

勢不集

衆幾傾

白日沒

時晦冥

顧中牟

心屏營

同盟疑

計無成

賴我武皇

萬國寧

右戰滎陽曲凡二十句其十八句句三字二句句四字

漢第三曲艾如張今第三曲獲呂布言曹公東圍臨淮生擒呂布也

獲呂布

戮陳宮

芟夷鯨鯢

驅騁羣雄

囊括天下

運掌中

右獲呂布曲凡六句其三句句三字三句句四

字

漢第四曲上之回今第四曲克官渡言曹公與袁紹戰破之於官渡也

克紹官渡

由白馬

僵屍流血

被原野

賊衆如犬羊

王師尚寡

沙塹傍

風飛揚

轉戰不利

士卒傷

今日不勝

後何望

土山地道

不可當

卒勝大捷

震冀方

屠城破邑

神武遂章

右克官度曲凡十八句其八句句四字一句句

五字九句句三字

漢第五曲翁離今第五曲舊邦言曹公勝袁紹於官渡  
還譙收藏士卒死亡也

舊邦蕭條

心傷悲

孤鳧翩翩

當何依

游士戀故

涕如摧

兵起事大

令願違

博求親戚

在者誰

立廟置後

鳧來歸

右舊邦曲凡十二句其六句句三字六句句四  
字

漢第六曲戰城南今第六曲定武功言曹公初破鄴武  
功之定始乎此也

定武功

濟黃河

河水湯湯

且莫有橫流波

袁氏欲衰 兄弟尋干戈 決漳水 水流滂沱

嗟城中如流魚 誰能復顧室家 計窮慮盡 求來連和

和不時 心中憂戚 賊衆內潰 君臣奔北

拔鄴城 奄有魏國 王業艱難 覽觀古今

可爲長歎

右定武功曲凡二十一一句其五句句三字三句  
句六字十二句句四字一句五字

漢第七曲巫山高今第七曲屠柳城言曹公越北塞歷  
白檀破三郡烏桓於柳城也

屠柳城 功誠難 越度隴塞 路漫漫

北踰岡平

但聞悲風正酸

蹋頓授首

遂登白狼山

神武懋海外

永無北顧患

右屠柳城曲凡十句其三句句三字三句句四字  
字三句句五字一句六字

漢第八曲上陵今第八曲平南荆言曹公南平荆州也

南荆何遼遠

江漢濁不清

菁茅久不貢

王師赫南征

劉琮據襄陽

賊備屯樊城

六軍廬新野

金鼓震天庭

劉子面縛至

武皇許其成

許與其成

撫其民

陶陶江漢間

普爲大魏臣

大魏臣

向風思自新

思自新

齊功古人

在昔虞與唐

大魏得與均

多選忠義士

爲喉脣

天下一定

萬世無風塵

右平南荆曲凡二十四句其十七句句五字四  
句句三字三句句四字

漢第九曲將進酒今第九曲平關中言曹公征馬超定  
關中也

平關中

路向潼

濟濁水

立高墉

鬪韓馬

離羣凶

選驍騎

縱兩翼

虜崩潰

級萬億

右平關中曲凡十句句三字

漢第十曲有所思今第十曲應帝期言曹文帝以聖德受命應運期也

應帝期

於昭我文皇

歷數承天序

龍飛自許昌

聰明昭四表

恩德動遐方

星辰爲垂耀

日月爲重光

河洛吐符瑞

草木挺嘉祥

麒麟步郊野

黃龍游津梁

白虎依山林

鳳凰鳴高岡

考圖定篇籍

功配亶古義皇

義皇無遺文

仁聖相因循

運期三千歲

一生聖明君

堯授舜萬國



萬國皆附親

四門爲穆穆

教化常如神

大魏興盛

與之爲鄰

右應帝期曲凡二十六句其一句三字二句四

字二十二句句五字一句六字

漢第十一曲芳樹今第十一曲邕熙言魏氏臨其國君臣邕穆庶績咸熙也

邕熙

君臣合德

天下治

隆帝道

獲瑞寶

頌聲竝作

洋洋浩浩

吉日臨高堂

置酒列各倡

歌聲一何紆餘

雜笙簧

八音諧

有紀綱

子孫永建萬國

壽考樂無央

右邕熙曲凡十五句其六句句三字三句句四字一句二字三句句五字二句句六字

漢第十二曲上邪今第十二曲太和言魏明帝繼體承統太和改元德澤流布

惟太和元年

皇帝踐祚

聖且仁

德澤爲流布

灾蝗一時爲絕息

上天時雨露

五穀溢田疇

四民相率遵軌度

事務澂清

天下獄訟察以情

元首明

魏家如此

那得不太平

右太和曲凡十三句其二句句三字五句句五  
字三句句四字三句句七字

晉鼓吹歌曲二十二篇

傅玄作

靈之祥

古朱鷺行

靈之祥言宣皇帝之佐魏猶虞舜之事堯也既有石瑞  
之徵又能用武以誅孟度之逆命也

靈之祥

石瑞章

旌金德

出西方

天命降

授宣皇

應期運

時龍驤

繼大舜

佐陶唐

贊武文

建帝綱

孟氏叛

據南疆

追有扈

亂五常

吳寇勁

蜀虜彊

交誓盟

連遐荒

宣赫怒

奮鷹揚

震乾威

耀電光

陵九天

陷石城

梟逆命

拯有生

萬國安

四海寧

宣受命

古思悲翁行

宣受命言宣皇帝禦諸葛亮養威重運神兵亮震怖而死

宣受命

應天機

風雲時動

神龍飛

禦葛亮

鎮雝涼

邊境安

民夷康

務節事

勤定傾

覽英雄

保持盈

淵穆穆

赫明明

沖而泰

天之經

養威重

運神兵

亮乃震死

天下寧

征遼東

古艾而張行

征遼東言宣皇帝陵大海之表討滅公孫淵而梟其首也

征遼東

敵失據

威靈邁日域

淵既授首

羣逆破膽

咸震怖

朔北響應

海表景附

武功赫赫

德雲布

宣輔政

古上之回行

宣輔政言宣皇帝聖道深遠撥亂反正網羅文武之才

以定二儀之序也

宣皇輔政 聖烈深 撥亂反正 從天心

網羅文武才 慎厥所生 所生賢 遺教施

安上治民 化風移 肇初帝基 洪業垂

於鑠明明 時赫戲 功濟萬世 定二儀

定二儀 雲澤雨施 海外風馳

時運多 古攤離行

時運多言宣皇帝致討吳方有征無戰也

時運多難 道教痛 天地變化 有盈虛

蠡爾吳蠻 虎視江湖 我皇赫斯 致天誅

有征無戰 弭其圖 天威橫被 震東隅

景龍飛 古戰城南行

景龍飛言景帝克明威教賞從夷逆胙隆無疆崇此洪基也

景龍飛 御天威 聰鑑立發 動與神明協機

從之者顯 逆之者滅夷 文教敷 武功巍

普被四海 萬邦望風 莫不來綏 聖德潛斷

先天弗違 弗違祥 享世永長 猛以致寬

道化光 赫明明 胙隆無疆 帝續惟期

有命既集 崇此洪基

平玉衡

古巫山高行

平玉衡言景皇帝一萬國之殊風齊四海之乖心禮賢養士而纂洪業也

平玉衡

糾姦回

萬國殊風

四海乖

禮賢養士

羈御英雄思心齊

纂成洪業

崇皇階

品物咸亨

聖敬日躋

聰鑑盡下情

明明綜天機

文皇統百揆

古上陵行

百揆言文皇帝始統百揆用人有序以敷泰平之化也

文皇統百揆

繼天理萬方

武將鎮四隅



英佐盈朝堂

謀言協秋蘭

清風發其芳

洪澤所漸潤

礫石爲珪璋

大道侔五帝

盛德踰三王

咸光大

上參天與地

至化無內外

無內外

六合竝康乂

竝康乂

邁茲嘉會

在昔羲與農

大晉德斯邁

鎮征及諸州

爲蕃衛

功濟四海

洪烈流萬世

因時運

古將進酒行

因時運言文皇帝因時運變聖謀潛施解長蛇之交離羣桀之黨以武濟文審其大計以邁其德也

因時運

聖策施

長蛇交解

羣桀離

勢窮奔吳

虎騎厲

惟武進

審大計

時邁其德

清一世

惟庸蜀

古有所思行

惟庸蜀言文皇帝既平萬乘之蜀封建萬國復五等之爵也

惟庸蜀

僭號天一隅

劉備逆帝命

禪亮承其餘

擁衆數十萬

闕隙乘我虛

驛騎進羽檄

天下不遑居

姜維屢寇邊

隴上爲荒墟

文皇愍斯民

歷世受皇辜

外謨蕃屏臣

內謀衆士夫

爪牙應指授

腹心同獻良圖

良圖協成文

大興百萬軍

雷鼓震地起

猛勢陵浮雲

逋虜畏天誅

面縛造壘門

萬里同風教

逆命稱妾臣

光建五等

紀綱天人

天序

古芳樹行

天序言聖皇應歷受禪弘濟大化用人各盡其才也

天序

應歷受禪

承靈祐

御羣龍

勒螭虎

弘濟大化

英儁作輔

明明統萬機

赫赫鎮四方

咎繇稷契之疇協蘭芳

禮王臣

覆兆民

化之如天與地

誰敢愛其身

大晉承運期

古上邪行

大晉承運期言聖皇應籙受圖化象神明也

大晉承運期

德隆聖皇

時清宴

白日叅光

應籙圖陟帝位

繼天正玉衡

化行象神明

至哉道隆虞與唐

元首敷洪化

百寮股肱竝忠良

民大康

隆隆赫赫

福胙盈無疆

金靈運

古君馬行

靈運言聖皇踐阼致敬宗廟而孝道施於天下也

金靈運

天符發

聖徵見

參日月

惟我皇

體神聖

受魏禪

應天命

皇之興

靈有徵

登大麓

御萬乘

皇之輔

若虓虎

爪牙奮

莫之禦

皇之佐

贊清化

百事理

萬邦賀

神祇應

嘉瑞章

恭享祀

薦先皇

樂時奏

磬管鏘

鼓淵淵

鍾喤喤

奠尊俎

實玉觴

神歆饗

咸說康

宴孫子

祐無疆

大孝烝烝

德教被萬方

於穆我皇

古雉子行

於穆言聖皇受命德合神明也

於穆我皇

盛德聖且明

受禪君世

光濟羣生

普天率土

莫不來庭

顒顒六合內

望風仰泰清

萬國雖離

興頌聲

大化洽

地平而天成

七政齊

玉衡惟平

峨峨佐命

濟濟羣英

夙夜乾乾

萬機是經

雖治興

匪荒寧

謙道光

沖不盈

天地合德

日月同榮

赫赫煌煌

耀幽冥

三光克從

於顯天垂景星

龍鳳臻

甘露宵零

肅神祇

祇上靈

萬物欣戴

自天效其成

仲春振旅

古聖人出行

仲春言大晉申文武之教田獵以時也

仲春振旅

大致民

武教於時日新

師執提

工執鼓

坐作從

節有序

盛矣允文允武

蒐田表禡

申法誓

遂圍禁

獻社祭

允矣時明國制

文武竝用

禮之經

列車如戰

大教明

古今誰能去兵

大晉繼天

濟羣生

夏苗田

古臨高臺行

苗田言大晉田狩從時爲苗除害也

夏苗田

運將徂

軍國異容

文武殊

乃命羣吏

選車徒

辯其名號

贊契書

王軍啓八門

行同上帝居

時路建大麾

雲旗翳紫虛

百官象其事

疾則疾徐則徐

回衡旋軫



罷陳敝車

獻禽享祠

烝烝配有虞

惟大晉

德參兩儀

化雲敷

仲秋彌田

古遠期行

仲秋言大晉雖有文德不廢武事從時以殺伐也

仲秋彌田

金德常剛

涼風清且厲

凝露結爲霜

白虎司辰

蒼隼時鷹揚

鷹揚猶周尚父

從天以殺伐

春秋時敘

雷霆震威耀

進退由鉦鼓

致禽祀祊

羽毛之用充軍府

赫赫大晉德

芬烈陵三五

敷化以文

雖治不廢武

光宅四海

永享天之祐

從天道

古石留行

從天道言仲冬大閱用武脩文大晉之德配天也

從天道

握神契

三時亦講武事

冬大閱

鳴鑼振鼓鐸

旌旗象虹霓

文制其中

武不窮武

動軍誓衆

禮成而義舉

三驅以崇仁

進止不失其序

兵卒練

將如虎

惟虓虎

氣陵青雲

解圍三面

殺不殄羣

偃旌麾

班六軍

獻享烝

脩典文

嘉大晉

德配天

祿報功

爵俟賢

饗燕樂

受茲百祿

嘉萬年

唐堯

古務成行

古曲亡

唐堯言聖皇陟帝位德化光四表也

唐堯咨務成

謙謙德所興

積漸終光大

履霜致堅冰

神明道自然

河海猶可凝

舜禹統百揆

元凱以次升

禪讓應天歷

睿聖世相承

我皇陟帝位

平衡正準繩

德化飛四表

祥氣見其徵

興王坐俟旦

亡主恬自矜

致遠由近始

覆簣成山陵

披圖按先籍

有其證靈

玄雲

古玄雲行

古曲亡

玄雲言聖皇用人各盡其材也

玄雲起山嶽

祥氣萬里會

龍飛何蜿蜿

鳳翔何翩翩

昔在唐虞朝

時見青雲際

今親遊方國

流光溢天外

鶴鳴在後園

清音隨風邁

成湯隆顯命

伊摯來如飛

周文獵渭濱

遂載呂望歸

符合如影響

先天天弗違

輟耕總地綱

解褐衿天維

元功配二主

芬馨世所稀

我皇敘羣才

洪烈何巍巍

桓桓征四表

濟濟理萬機

神化感無方

髦才盈帝畿

丕顯惟昧且

日新孔所咨

茂哉聖明德

日月同光輝

伯益

古黃爵行

古曲亡

伯益言赤烏銜書有周公興今聖皇受命神雀來也

伯益佐舜禹

職掌山與川

德侔十六相

思心入無閒

智理周萬物

下知衆鳥言

黃雀應清化

翔集何翩翩

和鳴棲庭樹

徘徊雲日間

夏桀爲無道

密網施山阿

酷祝振纖網

當柰黃雀何

殷湯崇天德

去其三面羅

逍遙羣飛來

鳴聲乃復和

朱雀作南宿

鳳凰統羽羣

赤鳥銜書至

天命瑞周文

神雀今來遊

爲我受命君

嘉祥致天和

膏澤降青雲

蘭風發芳氣

闔世同其芬

釣竿

古釣竿行

漢鏡歌二十  
三無釣竿

釣竿言聖皇德配堯舜又有呂望之佐以濟大功致太  
平也

釣竿何冉冉

甘餌芳且鮮

臨川運思心

微綸沈九淵

太公寶此術

乃在靈祕篇

機變隨物移

精妙貫未然

遊魚驚著釣

潛龍飛戾天

戾天安所至

撫翼翔太清

太清一何異

兩儀出渾成

玉衡正三辰

造化賦羣形

退願輔聖君

與神合其靈

我君弘遠略

天人不足并

天人初并時

昧昧何茫茫

日月有徵兆

文象興二皇

蚩尤亂生民

黃帝用兵征萬方

逮夏禹而德衰

三代不及虞與唐

我皇聖德配堯舜

受禪卽祚享天祥

率土蒙祐

靡不肅

庶事康

庶事康

穆穆明明 荷百祿 保無極 永泰平

吳鼓吹曲十二篇 韋昭造

炎精缺者言漢室衰武烈皇帝奮迅猛志念在匡救然而王迹始乎此也漢曲有朱鷺此篇當之第一

炎精缺 漢道微 皇綱弛 政德違

衆姦熾 民罔依 赫武烈 越龍飛

陟天衢 耀靈威 鳴鼙鼓 抗電麾

撫乾衡 鎮地機 厲虎旅 騁熊羆

發神聽 吐英奇 張角破 邊韓羈

宛穎平 南土綏 神武章 渥澤施



金聲震

仁風馳

顯高門

啓皇基

統罔極

乖將來

右炎精缺曲凡三十句句三字

漢之季者武烈皇帝悼漢之微痛卓之亂興兵奮擊功蓋海內也漢曲有思悲翁此篇當之第二

漢之季

董卓亂

桓桓武烈

應時運

義兵興

雲旗建

厲六師

羅八陳

飛鳴鏑

接白刃

輕騎發

介士奮

醜虜震

使衆散

劫漢主

遷西館

雄豪怒

元惡僨

赫赫皇祖

功名聞

右漢之季曲凡二十句其十八句句三字二句句四字

摠武師者言大皇帝卒武烈之業而奮征也漢曲有艾如張此篇當之第三

摠武師 斬黃祖 肅夷凶族 革平西夏

炎炎大烈 震天下

右摠武師曲凡六句其三句句三字三句句四字

烏林者言曹操旣破荊州從流東下欲來爭鋒大皇帝命將周瑜逆擊之於烏林而破走也漢曲有上之回此

篇當之第四

曹操北伐 拔柳城 乘勝席卷 遂南征

劉氏不睦 八都震驚 衆旣降 操屠荆

舟車十萬 揚風聲 議者狐疑 慮無成

賴我大皇 發聖明 虎臣雄烈 周與程

破操烏林 顯章功名

右伐烏林曲凡十八句其十句句四字八句句

三字

秋風者言大皇帝說以使民民忘其死漢曲有攤離此篇當之第五

秋風揚沙塵

寒露霑衣裳

角弓持弦急

鳩鳥化爲鷹

邊丞飛羽檄

寇賊侵界疆

跨馬披介冑

忼慨懷悲傷

辭親向長路

安知存與亡

窮遠固有分

志士思立功

邀之戰場

身逸獲高賞

身沒有遺封

右秋風曲凡十五句其十四句句五字一句四字

字

克皖城者言曹操志圖并兼而令朱光爲廬江太守上親征光破之於皖城也漢曲有戰城南此篇當之第六

克滅皖城

遏寇賊

惡此凶孽

阻姦慝

王師赫征 衆傾覆 除穢去暴 戢兵革

民得就農 邊境息 誅君弔臣 昭至德

右克皖城曲凡十二句其六句句三字六句句

四字

關背德者言蜀將關羽背棄吳德心懷不軌大皇帝引師浮江而禽之也漢曲有巫山高此篇當之第七

關背德 作鴟張 割我邑城 圖不祥

稱兵北伐 圍樊襄陽 嗟臂大於股 將受其殃

魏吳聖主 獻德與立通 與立通 親任呂蒙

泛舟洪汜池 游涉長江 神武一何桓桓

聲烈正與風翔 歷撫江安城 大據郢邦

虜羽授首 百蠻咸來同 盛哉無比隆

右關背德曲凡二十一一句其八句句四字二句  
句六字七句句五字四句句三字

通荆門者言大皇帝與蜀交好齊盟中有關羽自失之  
愆戎蠻樂亂生變作患蜀疑其眩吳惡其詐乃大治兵  
終復初好也漢曲有上陵此篇當之第八

荆門限巫山 高峻與雲連 蠻夷阻其險

歷世懷不賓 漢王據蜀郡 崇好結和親

申微中情疑 讒夫亂其間 大皇赫斯怒

虎臣勇氣震

蕩滌幽藪

討不恭

觀兵揚炎燿

厲鋒整封疆

整封疆

闡揚威武容

功赫戲

洪烈炳章

邈矣帝皇世

聖吳同厥風

荒裔望清化

化恢弘

煌煌大吳

延祚永未央

右通荆門曲凡二十四句其十七句句五字四  
句句三字三句句四字

章洪德者言大皇帝章其大德而遠方來附也漢曲有  
將進酒此篇當之第九

章洪德

邁威神

感殊風

懷遠鄰

平南裔

齊海濱

越裳貢

扶南臣

珍貨充庭

所見日新

右章洪德曲凡十句其八句句三字二句句四

字

從歷數者言大皇帝從籙圖之符而建大號也漢曲有所思此篇當之第十

從歷數

於穆我皇帝

聖哲受之天

神明表奇異

建號翔皇基

聰睿協神思

德澤浸及昆蟲

浩蕩越前代

三光顯精耀

陰陽稱至治

肉角步郊畛

鳳凰棲靈囿



神龜游沼池

圖識摹文字

黃龍覲鱗

符祥日月記

覽往以察今

我皇多噲事

上欽昊天象

下副萬姓意

光被彌蒼生

家戶蒙惠賚

風教肅以平

頌聲章嘉喜

大吳興隆

綽有餘裕

右從歷數曲凡二十六句其一句句三字三句

句四字二十二句句五字一句六字

承天命者言上以聖德踐位道化至德盛也漢曲有芳樹此篇當之第十一

承天命

一 穆聖德

二 精絜象

三 符靈表德

巨石立

九穗植

龍金其鱗

烏赤其色

輿人歌

億夫歎息

超龍升

襲帝服

躬淳懿

體玄嘿

夙興臨朝

勞謙日昊

易簡以崇仁

放遠讒與慝

舉賢才

親近有德

均田疇

茂稼穡

審法令

定品式

考功能

明黜陟

人思自盡

惟心與力

家國治

王道直

思我帝皇

壽萬億

長保天祿

胙無極

右承天命曲凡三十四句其十九句句三字二

句句五字十三句句四字

玄化者言上修文訓武則天而行仁澤流洽天下喜樂也漢曲有上邪此篇當之第十二

玄化象以天

陛下聖真

張皇綱

率道以安民

惠澤宣流而雲布

上下睦親

君臣酣宴樂

激發茲歌揚妙新

脩文籌廟勝

須時備駕巡洛津

康哉泰

四海歡忻

越與三五鄰

右玄化曲凡十三句句五字二句句三  
字三句句四字三句句七字

今鼓吹鏡歌詞

樂人以音聲相傳話不可復解

大竭夜烏白云何來堂吾來聲烏奚姑悟姑尊盧聖子  
黃尊來餽清嬰烏白日爲隨來郭吾微令吾應龍夜烏  
由道何來直子爲烏奚如悟姑尊盧雞子聽烏虎行爲  
來明吾微令吾

詩則夜烏道祿何來黑洛道烏奚悟如尊爾尊盧起黃  
華烏伯遼爲國日忠雨令吾

伯遼夜烏若國何來日忠雨烏奚如悟姑尊盧面道康  
尊錄龍永烏赫赫福昨夜音微令吾

右四解上邪曲

幾令吾幾令諸韓亂法正令吾

幾令吾諸韓從聽心令吾若里洛何來韓微令吾尊盧  
忌盧文盧子路子路爲路雞如文盧炯烏諸胙微令吾  
幾令諸韓或公隨令吾

幾令吾幾諸或言隨令吾黑洛何來諸韓微令吾尊盧  
安成隨來免路路子爲吾路奚如文盧炯烏諸胙微令  
吾

右九解晚芝田

漢曲有遠  
期疑是

幾令吾呼歷舍居執來隨咄武子邪令烏銜針相風其  
右其右

幾令吾呼羣議破葫執來隨吾咄武子邪令烏令烏令

臙入海相風及後

幾令吾呼無公赫吾執來隨吾咄武子邪令烏無公赫  
吾媿立諸布始布

右三解艾張曲

鼓吹鏡歌十五篇 何承天義熙中私造

朱路篇

朱路揚和鸞 翠蓋耀金華 玄牡飾樊纓

流旌拂飛霞 雄戟闢曠塗 班劔翼高車

三軍且莫喧 聽我奏鏡歌 清鞞驚短簫

朗鼓節鳴笳 人心惟愷豫 茲音亮且和

輕風起紅塵

渟瀾發微波

逸韻騰天路

積響結城阿

仁聲被八表

威震振九遐

嗟嗟介胄士

勗哉念皇家

思悲公篇

思悲公

懷衮衣

東國何悲

公西歸

公西歸

流二叔

幼主旣悟

偃禾復

偃禾復

聖志申

營都新邑

從斯民

從斯民

德惟明

制禮作樂

興頌聲

興頌聲

致嘉祥

鳴鳳爰集

萬國康

萬國康

猶弗已

握髮吐餐

下羣士

惟我君 繼伊周 親覩盛世 復何求

離離篇

離士多離心 荆民懷怨情 二凶不量德

構難稱其兵 王人銜朝命 正辭糾不庭

上宰宣九伐 萬里舉長旌 樓船掩江濱

駟介飛重英 歸德戒後夫 賈勇尚先鳴

逆徒既不濟 愚智亦相傾 霜鋒未及染

隲郢忽已清 西川無潛鱗 北渚有奔鯨

凌威致天府 一戰夷三城 江漢被美化

宇宙歌太平 惟我東郡民 曾是深推誠



戰城南篇

戰城南

衝黃塵

丹旌電燄

鼓靄震

勅敵猛

戎馬殷

橫陳亘野

若屯雲

仗大從

應三靈

義之所感

士忘生

長劔擊

繁弱鳴

飛鏑炫晃

亂奔星

虎騎躍

華毘旋

朱火延起

騰飛煙

驍雄斬

高旗擐

長角浮叫

響清天

夷羣寇

殪逆徒

餘黎霑惠

詠來蘇

奏愷樂

歸皇都

班爵獻俘

邦國娛

巫山高篇

巫山高

三峽峻

青壁千尋

深谷萬仞

崇巖冠靈

林冥冥

山禽夜響

晨猿相和鳴

洪波迅復

載逝載停

悽悽商旅之客

懷苦情

在昔陽九

皇綱微

李氏竊命

宣武耀靈威

蠢爾逆縱

復踐亂機

王旅薄伐

傳首來至京師

古之爲國

惟德是貴

力戰而虛民

鮮不顛墜

矧乃叛戾

伊胡能遂

咨爾巴子

無放肆

上陵者篇

上陵者

相追攀

被服纖麗

振綺紈

攜童幼

升崇巒

南望城闕

鬱槃桓

王公第

通衢端

高薨華屋

列朱軒

臨濬谷

掇秋蘭

士女悠奕

映隰原

指營丘

感牛山

爽鳩旣沒

景君歎

嗟歲聿

游不還

志氣衰沮

玄鬢斑

野莽宿

墳土乾

顧此纍纍

中心酸

生必死

亦何怨

取樂今日

展情權

將進酒篇

將進酒

慶三朝

備繁禮

薦嘉肴

榮枯換

霜霧交

緩春帶

命朋僚

車等旗

馬齊鑣

懷溫克

樂林濠

士失志

慍情勞

思旨酒

寄遊遨

敗德人

甘醇醪

耽長夜

或淫妖

興屢舞

厲哇謠

形傴傴

聲號呶

首旣濡

志亦荒

性命夭

國家亡

嗟後生

節酣觴

匪酒辜

孰爲殃

君馬篇

君馬麗且閑

揚鑣騰逸姿

駿足躡流景

高步追輕飛

冉冉六轡柔

奕奕金華暉

輕霄翼羽蓋

長風靡淑旂

願爲范氏驅

雖容步中畿

豈效詭遇子

馳騁趣危機

鉛陵策良駟

造父爲之悲

不怨吳坂峻

但恨伯樂稀

赦彼岐山盜

實躋韓原師

柰何漢魏主

縱情營所私

疲民甘藜藿

廐馬患盈肥

人畜賀厥養

蒼生將焉歸

芳樹篇

芳樹生北庭

豐隆正裴徊

翠穎陵冬秀

紅葩迎春開

佳人閑幽室

惠心婉以諧

蘭房掩綺幌

綠草被長階

日夕遊雲際

歸禽命同棲

皓月盈素景

涼風拂中閨

哀弦理虛堂

要妙清且悽

嘯歌流激楚

傷此碩人懷

梁塵集丹帷

微颺揚羅袿

豈怨嘉時莫

徒惜良願乖

有所思篇

有所思

思昔人

曾閱二子

善養親

和顏色

奉晨昏

至誠烝烝

通明神

鄒孟軻

爲齊卿

稱身受祿

不貪榮

道不用

獨攤楹

三徙旣諄

禮義明

飛鳥集

猛獸附

功成事畢

乃更娶

哀我生

遭凶旻

幼罹荼毒

備艱辛

慈顏絕

見無因

長懷永思

託丘墳

雉子遊原澤篇

雉子遊原澤

初懷耿介心

飲啄雖勤苦

不願棲園林

古有避世士

抗志凌霄岑

浩然寄卜肆

揮權通川陰

消搖風塵外

散髮撫鳴琴

卿相非所眄

何況於千金

功名豈不美

寵辱亦相尋

冰炭結六府

憂虞纏胸襟

當世須大度

量已不克任

三復泉流誠

自驚良已深

上邪篇

上邪下難正

衆枉不可矯

音和響必清

端影緣直表

大化揚仁風

齊人猶偃草

聖王旣已没

誰能弘至道

開春湛柔露

代終肅嚴霜

承平貴孔孟

政敝侯申商

孝公明賞罰

六世猶克昌

李斯肆濫刑

秦氏所以亡

漢宣隆中興

魏祖寧三方

譬彼針與石

效疾故稱良

行葦非不厚

悠悠何詎央

琴瑟時永調

改弦當更張



矧乃治天下

此要安可忘

臨高臺篇

臨高臺

望天衢

飄然輕舉

陵太虛

攜列子

超帝鄉

雲衣雨帶

乘風翔

肅龍駕

會瑤臺

清暉浮景

溢蓬萊

濟西海

濯洧盤

佇立雲岳

結幽蘭

馳迅風

遊炎州

願言桑梓

思舊遊

傾霄蓋

靡電旌

降彼天塗

頽窈冥

辭仙族

歸人羣

懷忠抱義

奉明君

任窮達

隨所遭

何爲遠想

令心勞

遠期篇

遠期千里客

肅駕候良辰

近命城郭友

具爾惟懿親

高門啓雙闈

長筵列嘉賓

中唐舞六佾

三廂羅樂人

簫管激悲音

羽毛揚華文

金石響高宇

絃歌動梁塵

脩標多巧捷

九劔亦入神

遷善自雅調

成化由清均

主人垂隆慶

羣士樂亡身

願言聖明君

邇期保萬春

石流篇

石上流水

湔湔其波

發源幽岫

永歸長河

瞻彼逝者 歲月其偕 子在川上 惟以增懷

嗟我殷憂 載勞寤寐 邁此百罹 有志不遂

行年倏忽 長勤是嬰 永言沒世 悼茲無成

幸遇開泰 沐浴嘉運 緩帶安寢 亦又何慍

古之爲仁 自求諸已 虛情遙慕 終於徒已

聖人制禮樂一篇巾舞歌一篇按景徇廣樂記言字  
訛謬聲辭雜書宋鼓吹鏡歌辭四篇舊史言詁不可  
解漢鼓吹鏡歌十八篇按古今樂錄皆聲辭艷相雜  
不可復分

宋書卷二十二

宋書卷二十二考證

樂志四靈芝篇伯瑜年七十采衣以娛親○伯瑜一本作伯俞臣照按困學紀聞引陳思王此二語云人但知老萊子之事而不知伯瑜顧老萊子伯瑜是否兩人亦無可考也

孟冬篇鐘擊位無餘○曹植集作擊鐘醕無餘

碣石篇○臣承蒼按此曲辭卽前二十一卷所載步出

夏門行四解之一乃魏武帝作

芳樹曲妬人之子悲殺人○妬一本作如

漢第五曲翁離今第五曲舊邦○翁晉書作雍臣承蒼

按晉鼓吹歌曲內有時運多一篇題曰古攤離行攤與雍通作翁誤也

靈之祥篇吳寇勁○勁晉書作叛

宣受命篇亮乃震死天下寧○死傅集作斃晉書寧上有安字

征遼東篇淵既授首○淵晉書作公孫傅集同臣承蒼

按晉書成於唐太宗避高祖諱故稱公孫後人校刻傅集復據晉書改竄作淵也

宣輔政篇雲澤雨施○澤晉書作行

景龍飛篇聰鑑立發○發字晉書及傅集皆作察

平玉衡篇纂成洪業○成晉書傅集皆作戎

文皇統百揆篇武將鎮四隅○諸本俱作武皇鎮四寓

今據晉書傅集改正

惟庸蜀篇腹心同獻良圖○晉書無同字

天序篇天序句應歷受禪句○晉書天序歷爲一句應

受禪爲一句

仲秋彌田篇鷹揚猶周尚父從天以殺伐○晉書無周

字又從作順

從天道○晉書作順天道臣承蒼按沈約仕齊作宋書

其後復顯於梁武帝父名順之故凡順字皆改爲從

其有仍用順字者殆傳寫之誤也

從天道篇三時亦講武事○亦晉書作示以三時示爲句

又將如虎惟虓虎○晉書如字下有虓字

又受茲百祿嘉萬年○嘉晉書作壽

唐堯篇披圖按先籍有其證靈○晉書靈字下有液字

臣承蒼

按原文當有液字後人疑此二句韻不諧故

去一液字以靈字合於上文繩徽矜陵等字爲一韻不知古人詩歌凡今庚青部之字皆不與蒸部同用若存此液字則與上句籍字別爲一韻更合也

秋風曲志士思立功○一本復思立功三字

君馬篇願爲范氏驅雖容步中畿豈效詭遇子馳騁趣  
危機○臣承蒼按范氏二字疑作範我與下文詭遇  
相對觀第十曲有所思篇直述孟子爲齊卿事可見  
其用意所在

上邪篇上邪下難正衆枉不可矯○臣承蒼按漢鼓吹

鏡歌其第十二曲曰上邪本無意義邪字大約與耶  
同是語助辭繆襲傳元盡更其名雖依漢曲次第而  
辭旨各殊第十二曲皆不用上邪二字至何承天作  
直以爲上下之上邪正之邪其雍離一篇或作攤離



亦無意義何承天直以爲雍州之雍離合之離首云  
雍士多離心然則古人作樂府第各以其意爲之非  
有定式古今樂錄雖言所以製曲之意後之作者亦  
不盡拘若其音節則益不可攷矣

宋書卷二十二考證